

TEKS UCAPAN  
BRIG. JEN. DATO' PROF. DR. KAMARUDIN HUSSIN  
NAIB CANSELOR UNIMAP  
SEMPENA  
MAJLIS MAKAN MALAM JASAMU DIKENANG – HAJAH FOYZIAH  
PADA 30 JULAI 2009  
DI HOTEL PUTRA PALACE

Bismillahirrahmanirrahim

Yg. Diraikan, Puan Hajah Foyziah Ahmad Nasuruddin, Ketua Pustakawan UniMAP dan Suami.

Y. Bhg. Prof Dr. Zul Azhar Zahid Jamal, Timbalan Naib Canselor Penyelidikan dan Inovasi UniMAP dan Isteri.

Y. Berusaha Tn Haji Rusli, Pendaftar UniMAP.

Y. Berusaha Pn. Saodah Hasan, Bendahari UniMAP.

Dekan-dekan dan Ketua-Ketua Jabatan

Our Honourable Guest from Yemen,

Tetamu-tetamu Kehormat yang terdiri daripada “The Pioneers” atau “Org Pertama” UniMAP.

Staf Jabatan Perpustakaan seterusnya staf-staf UniMAP yang dikasihi sekalian.

Assalamualaikum Warahmatullahi Wabarakatuh dan Selamat Malam

Wan Aunte (Selamat Malam), Maalai Vaanakkam (Selamat Malam), Konbanwa (Selamat Malam)

Alhamdulillah, bersyukur saya panjatkan pada Allah SWT kerana dengan limpah inayahnya dapat kita terus berhimpun dalam satu majlis perpisahan, majlis mengenang jasa dan keringat insan bertuah, Puan Hajah Foyziah yang tidak pernah lelah menabur bakti dan jasa dalam membangunkan UniMAP.

Dan bagi diri saya sendiri insan bertuah ini bukan sekadar pekerja saya, tetapi jauh di sudut hati beliaulah sahabat yang sama-sama sanggup bersengkang mata di awal penubuhan UniMAP dahulu.

Jutaan terima kasih dan sekalung tahniah buat semua Ahli Jawatankuasa yang bertungkus lumus dalam memastikan majlis ini menjadi realiti. Sesungguhnya usaha keras dan pengorbanan anda ini hanya akan dapat dibalas oleh Allah SWT.

Ladies and Gentlemen,

Alhamdulillah, I am grateful to Allah SWT for His blessing in giving us this precious opportunity to be here tonight, to celebrate not one, but two special events.

Tonight we are celebrating a Farewell Dinner to our Chief Librarian, Puan Hajah Foyziah Ahmad Nasaruddin and also a celebration of appreciation to “The Pioneers” of UniMAP. It is my pleasure to extend my appreciation to the committee for organizing such a great event tonight.

I, on behalf of UniMAP, would like to take this opportunity to pay tribute to Puan Hajah Foyziah for all her pain and hard work in making our library a first class service centre. I believe, being one the pioneers, it was a huge responsibility for her, in making the library like what it is now.

But with the courage and determination, she can now, sit back and smile, looking at all the accomplishments that she has achieved. We are also proud of the development and progress made over the years throughout her care. The library is like her baby and after seven years the library is now something for her to be proud of. **Bravo** to you Puan Hajah Foyziah!!

She may look **strict** to most of you, but trust me, she is a wonderful person and a loving mother. To me, her **spirit** and **willingness** to learn is the most precious value to UniMAP. It is very sad and

heartbreaking to let her go but I believe in her golden years, it is time for her to spend time with her loving hubby. Puan Hajah Foyziah, you will be missed dearly.

Tuan-tuan dan puan-puan sekalian,

Ramai yang hadir di sini sedar dan tahu betapa susah dan payahnya untuk membangunkan UniMAP, dan perasaan itu jugalah yang membelenggu minda dan benak Puan Hajah Foyziah ketika itu.

Saya percaya, beliau pastinya runsing dan bingung – bagaimana hendak membangunkan sebuah Perpustakaan khusus untuk pelajar-pelajar yang berteraskan kejuruteraan sedangkan ketika itu, tidak ada tapak untuk dijadikan kampus tetap.

Sememangnya bagi saya amat sukar tanggungjawab yang saya amanahkan pada beliau, namun semangat dan kesungguhan beliau membuatkan saya kagum dan bangga. Dari hanya sebuah perpustakaan sebesar bilik mesyuarat, beliau bersama lapan pekerja ketika itu bertungkus lumus mencari bahan bacaan yang bersesuaian dan melengkapkan perpustakaan “mini” ketika itu untuk kemudahan pelajar.

Sekali pandang pada wajahnya, pasti ramai yang beranggapan beliau seorang yang garang dan tegas dan pastinya mengundang rasa “tidak selesa” atau takut di kalangan pekerja beliau sendiri.

Tetapi saya percaya, “imej” beliau itu yang membuatkan beliau dihormati dan dapat melaksanakan tugas dengan penuh dedikasi. Biar luaran menunjukkan kita garang, tegas, serius kerana ia dapat membantu kita mendisiplinkan pekerja. Tetapi jauh di sudut hati, saya percaya, beliau seorang yang lembut dan bersifat keibuan.

Dan kini, setelah tujuh tahun kewujudan UniMAP, dan setelah tujuh tahun mengorbankan usia emasnya di UniMAP, saya kira Hajah Foyziah pasti boleh tersenyum bangga meninggalkan UniMAP. Bukan sedikit jasa yang beliau tinggalkan :

- Dari 0 buku – kini Perpustakaan UniMAP memiliki 35,000 naskhah buku.
- Kita juga telah memiliki 28 online database
- Jumlah e-book yang kini mencecah 90,000 tajuk
- Jumlah jurnal yang kini menghampiri 10,000 judul
- Bilangan staf perpustakaan yang telah mencecah 43 orang
- UniMAP juga boleh berbangga dengan kejayaan Hajah Foyziah menjadikan Perpustakaan UniMAP sebagai perpustakaan pertama di Malaysia yang membangunkan sistem Repository Digital menggunakan perisian D-Space.

- Dan kita juga berjaya memperkenalkan sistem capaian jarak jauh yang mana semua warga UniMAP tidak kira di mana pun mereka berada boleh membuat capaian kepada pangkalan data perpustakaan menggunakan Remote Acces.
- Melalui langkah ini, perpustakaan kita boleh dicapai baik oleh staf atau pelajar yang sedang berada di Perlis, lain-lain negeri di Malaysia ataupun sedang menyambung pengajian di luar negara. Bukankah ini sesuatu yang amat membanggakan dan memudahkan urusan pelajar dan staf?
- Pada masa yang sama, Perpustakaan UniMAP juga dilengkapi kawalan keselamatan yang tinggi menggunakan sistem RFID bagi menjamin bahan-bahan kita sentiasa dalam keadaan selamat.
- Di bawah pentadbiran Hajah Foyziah juga, sistem peminjaman dan pemulangan buku dapat dikendalikan secara layan diri tanpa memerlukan setiap peminjam berurusan dengan staf Perpustakaan.

Tuan-tuan dan puan-puan sekalian,

Jika diteliti semua senarai ini, pasti kita merasakan ia sesuatu yang mudah dan boleh dilakukan oleh semua pihak. Tetapi tidak bagi saya. Menjadi pemilik kepada nama Hajah Foyziah, yang dilahirkan dalam zaman semua perkara perlu dibuat secara manual sehingga terpaksa bekerja dalam era teknologi dan digital tetapi beliau tidak pernah mengalah mahupun berhenti belajar.

Beliau sentiasa membuka minda dan pemikiran untuk mempelajari apa juga perkara baru yang diperkenalkan di zaman millenium termasuk Aplikasi IT. Bagi saya “spirit” dan “willingness” beliau untuk terus belajar itu adalah sesuatu yang mahal dan menjadikan beliau begitu berharga dan bernilai di UniMAP.

Saya sukakan prinsip dan moto hidup yang beliau sentiasa pegang iaitu “Sebagai manusia kita perlu “relearn” dan “unlearn” untuk mencapai kejayaan”. Dan saya percaya dengan prinsip itulah beliau telah berjaya menjadikan Perpustakaan UniMAP sebagai Perpustakaan Kejuruteraan yang unggul. Sesungguhnya saya amat berbangga dengan pencapaian dan pembangunan Jabatan Perpustakaan yang sangat cepat dan mendahului visi dan misi yang telah kita tetapkan di awal penubuhan.

Tuan-tuan dan puan-puan sekalian,

Di saat tempoh perkhidmatan beliau telah hampir ke penghujung, beliau tidak terus meninggalkan kerja begitu sahaja. Beliau juga membanggakan saya apabila memilih untuk terus berkhidmat ke hari akhir dengan tidak mengambil cuti panjang seperti kebiasaannya.

Dan dalam tempoh akhir itu jugalah beliau telah berjaya mewujudkan satu ruang tambahan Perpustakaan di Tingkat 1 yang

mana saya sendiri telah dijemput merasmikan ruang tersebut Selasa lalu.

Projek pengubahsuaian ruang tambahan Perpustakaan telah siap dilaksanakan semenjak dimulakan pada bulan Mei 2009.

Dengan pembukaan dan operasi ruang tambahan ini, Insya-ALLAH kita berjaya menambah kapasiti tempat duduk daripada 368 unit kepada 478 unit iaitu penambahan sebanyak 110 unit dan pastinya ini akan memberikan lebih keselesaan kepada pelajar-pelajar dan warga UniMAP keseluruhannya.

Reka bentuk dan pengisian ruang ini mengambil kira keperluan para pelajar memandangkan mereka merupakan kumpulan majoriti yang mengunjungi perpustakaan secara fizikal di Bangunan KWSP. Ini meliputi keperluan menggunakan komputer untuk akses Internet, permintaan yang tinggi terhadap kabel berwayar bagi pengguna laptop, tahap penggunaan cetakan rangkaian yang semakin meningkat serta kecenderungan untuk belajar secara kolaboratif.

Meminjam, beberapa ciri konsep *Information Commons*, ruang ini direka bentuk dengan penggunaan warna terang, ruang belajar berkonseptan kafe, ruang santai yang luas dan terbuka serta

kemudahan komputer yang bakal dilengkapi dengan perisian terkini selain capaian kepada sumber maklumat elektronik langganan Perpustakaan.

Inilah bukti bahawa Hajah Foyziah sememangnya seorang insan yang begitu komited terhadap tugas. Bayangkan dalam tempoh kurang dua bulan dari tarikh persaraan beliau, namun beliau masih terus menabur khidmat dan bakti untuk memajukan lagi Perpustakaan UniMAP.

Dan pastinya, saya akan merindui semangat dan kesungguhan beliau ini. Jika boleh saya ingin beliau terus berkhidmat di UniMAP tetapi sebagai seorang insan saya perlu bertimbangrasa. Walaupun dengan berat hati, tetapi saya tetap rela melepaskan beliau pergi untuk menghabiskan waktu bersama suami tercinta.

Tuan-tuan dan puan-puan sekalian,

Bertepatan dengan semangat pertemuan pada malam ini saya rasa tidak lewat jika kita bersama-sama menyambut ulang tahun ke-7 pengambilan mahasiswa pertama UniMAP iaitu pada 20 Jun 2002. Pada hari ini genaplah 2,595 hari atau sekitar 1,920 hari bekerja atau 15,360 jam bekerja (jika didarabkan dengan masa bekerja selama 8 jam sehari) bagi Puan Hajah Foyziah dan sekitar 40 orang

staf yang mula-mula membina asas dan tapak perkembangan UniMAP.

Pada malam ini perhatikanlah insan-insan di sekeliling kita. Sebahagian besar daripada kita terdiri daripada insan-insan yang dipilih oleh Allah (s.w.t) untuk menjadi generasi pertama yang mencorakkan raut wajah UniMAP hari ini. Wajah-wajah inilah yang telah meraut, mengukir dan mempelas halus sejarah awal UniMAP hingga tika dan saat ini. Insan-insan inilah yang memelas dan menganyam ampuh susur-galur cecita dan hayat UniMAP.

Jiwa-jiwa inilah yang tidak kenal erti penat-lelah menyirami UniMAP dari kudupnya hingga mekar kelopak bebunga baktinya. Hati nurani inilah yang tidak barasa jemu-jelak membajai UniMAP dari putiknya hingga ranum bebuah didikannya.

Mereka inilah ‘Orang Pertama’ atau ‘The Pioneers’ UniMAP. (Saya memohon agar semua staf pertama UniMAP yang bersama-sama dengan saya menyambut mahasiswa pertama UniMAP pada 20 Jun 2002 agar bangun). Marilah kita berikan tepukan yang bergemuruh kepada ‘Orang Pertama’ UniMAP.

Saya tidak pernah menyangka bahawa pada malam ini setelah 371 minggu atau setelah 62,328 jam, sebahagian besar daripada kita masih bersama-sama, masih di bawah bumbung yang sama, dan masih seia-sekata dalam usaha membina jenama yang bernama

UniMAP. Semoga Allah memberi kita kekuatan dan keikhlasan yang sama ampuh dengan ikatan janji Rasulullah (s.a.w) kepada Penciptanya.

Tiada kata seindah bahasa dan tiada rasa senikmat bahagia yang dapat saya luahkan kepada saudara-saudara semua untuk mencitrakan rasa hati saya pada malam ini selain daripada menghulurkan ucapan syukran jazilah kathira kepada saudara-saudara. Ucapan yang sama saya panjangkan kepada ‘Insan-insan Berjasa’ dan Dekan dan Ketua Jabatan Pertama yang turut mencerlangkan dan mengharumkan malam yang mengandung jutaan makna ini.

Tuan-tuan dan puan-puan sekalian,

Sebagai tanda penghargaan UniMAP kepada segala usaha dan jasa saudara, biar sebesar zarah sekalipun, pada malam ini terimalah buku ‘Orang Pertama’. Pada malam ini, di singgahsana yang menyaksi antara mesyuarat-mesyuarat pertama yang melakar sejarah masa depan UniMAP, terimalah buah tangan kenangan yang tidak seberapa tetapi amat besar maknanya bagi kita semua.

Buku ‘Orang Pertama’, meskipun nilai ringgitnya tidak seberapa, tetapi saya yakin bahawa tiada nilai ringgit yang dapat menyamai nilai makna yang tersurat dan tersirat dalam ruang makna isi dan kandungannya.

Meskipun penerbitan buku ini telah tertangguh dua tahun lamanya, dan telah beberapa kali sidang editor memohon maaf kerana kelewatan pengedarannya, namun saya berpendapat bahawa apa jua takdir Allah amat indah pengertiannya.

Jika buku ini diedarkan dua tahun dahulu setelah dilancarkan oleh Duli Yang Teramat Mulia Tuanku Canselor pada 17 Ogos 2007, nescaya tercelalah sedikit penerbitannya.

Kerana kelewatan pengedaran itulah maka di dalam buku “Orang Pertama” itu dapat kita merakamkan sekelumit cerita daripada sejarah berharga Duli Yang Teramat Mulia Tuanku Hajah Lailatul Shahreen Akashah Khalil, Pro-Canselor Pertama UniMAP.

Kerana kelewatan itu jugalah kita dapat memetik cerita rahsia Felo SLAB UniMAP yang pertama pulang berkhidmat dengan ijazah kedoktoran. Jika saudara-saudara tidak pasti siapakah gerangan orangnya, telaahlah buku ‘Orang Pertama’ kerana di dalam buku itulah saudara-saudara dapat mengenali cerita ‘berisi’ orang pertama yang mengukir corak dan tingkah UniMAP yang dapat disaksi keupayaannya hari ini.

Sebagai tanda kasih, kerana terbit dan teredarnya buku ‘Orang Pertama’ mulai malam ini, marilah kita mengucapkan jutaan terima kasih kepada semua anggota sidang editor yang berusaha

melahirkannya. Terimalah pantun dua kerat daripada saya sebagai tanda penghargaan:

**Terima kasih, daun keladi,  
Buku “Mahasiswa Pertama”, bila lagi?**

Akhir kata, saya amat berharap agar semua yang hadir pada malam ini, sama ada ‘orang pertama’ atau ‘orang kedua’ atau insan yang keberapa sekalipun yang dinamai warga UniMAP, contohkanlah keampuhan ilmu, kesucian nilai keikhlasan dan kesemerbakan aroma kecemerlangan Puan Hajah Foyziah Ahmad Nasuruddin menaburkan benih dan mencambahkan tunas ilmu kepustakawanannya di perpustakaan dan di dalam diri warga perpustakaan UniMAP sehingga berjaya mengukir sejarah kegemilangannya yang eksklusif dengan cara gaya yang tersendiri di beberapa perpustakaan di negara kita, dan diakhiri pula dengan keterbilangannya di perpustakaan Universiti Malaysia Perlis.

Sekian, Wassalamualaikum Warahmatullahi WabaraktuH.

Terima Kasih.